

Ancjemò une volte, al è dut esaurît pai cors online di furlan

In pôcs dîs ancje la seconde edizion, realizade de SFF cu la poie de ARLeF, e à regjistrât il dut esaurît, cun iscrizions ancje de Argentine e dal Uruguay

In pocj zornadis ancje la seconde edizion online dai cors pratics di lenghe furlane, realizâts de Societât Filologjiche e sostignûts de ARLeF, e à regjistrât il dut esaurît!

«O vin crodût di subit in cheste gnove proposte formative, in stât di rivâ no dome in ogni bande dal mont, ma ancje a cui che, par resons diferentis, nol varès rivât a partecipâ aes lezions in presince – al à sotlineât Eros Cisilino, president de Agenzie Regionâl pe Lenghe Furlane -. La emergjence Covid-19 di fat e à modificât in maniere radicâl tantis nestris abitudins e la didatiche no à fat ecezion. Chest cambi di pas, però, al à rapresentât une oportunitât, e i numars lu dimostrin. Tal mê di Fevrâr, in pôcs dîs, a son esaurîts i 90 puecj disponibii, e cumò, pe seconde edizion dal cors, 120 personis si son notadis di subit. O sin une vore contents di cheste rispueste. Al vûl dî che o sin inte direzion juste».

La ativitât formative **gratuite**, tal 2021 e je stade caraterizade di une novitât impuartante: lis lezions di alfabetizazion si son davuelteis e si davuelzaran, **dal dut online**, su lis platformis Moodle e Zoom. Une decision determinade dal contest di emergjence, ma che e je risultade strategjiche e une vore preseade: **la formazion a distance e à permetût di rivâ ai furlans e ai apassionâts, dapardut. A son di fat ancje rivadis iscrizions no dome di Paîs europeans, ma ancje de Argentine e dal Uruguay.**

«Ancje se tal prin moment e je stade une sielte obleade, la rispueste che o vin vût e je stade otime – al à precisât Federico Vicario, president de Societât Filologjiche Furlane -. Chest al mostre no dome l'interès che al è pal aprendiment de marilenghe, ma ancje cemût che si sedi aromai disvilupade la cussience che o vin un strument in plui par valorizâ il furlan. La presince teritoriâl di fat e je fundamentâl, e o sperìn di podê tornâ a tacâ il prin pussibil, ma il web si è dimostrât un strument bon, che al podarà zontâsi tal futûr aes modalitâts plui tradizionâls. Un mieç che al pues rivâ ancje a chei che, in câs contrari, no podaressin partecipâ».

I cors pratics di lenghe furlane online a son fats par dâ struments simpri plui pratics e utii ai iscrijs, che se a frecuentaran almancul il 70% des lezions, a ricevaran un atestât di partecipazion: un titul culturâl par acedi ae liste regionâl dai insegnants cun competencis in lenghe furlane. La formazion si fonde sui contignûts dal prin volum de Golaine "Lenghe e culture" pai adults.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Il plan de opare al previôt 3 fassicui di 112 pagjinis ognidun, cuntun libri par ogni an di cors (I, II e III), spartît in 12 unitâts didatichis. Ogni unitât e presente une leture cun provis di comprension dal test, aprofondiments di gramatiche e esercizi, cun dificolâts cressintis sedi tal lessic che inte morfologjie verbâl. Il manuâl al è duncje organizât su la progression e su la gradualitât intal disvilup des abilitâts linguistichis. Il volum stampât al è a disposizion a gratis intes sedis de ARLeF e de SFF; in version digjitâl su www.arlef.it e www.filologicafriulana.it.

Udin, ai 21 di Mai dal 2021

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail:** arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<